

## Večeras derbi: Košarkaši OKK Slobode dočekuju Zrinjski

Derbi 8. kola prvenstva BiH za košarkaše igra se večeras u tuzlanskom Mejdanu, gdje ekipa OKK Slobode dočekuje mostarski Zrinjski.

Oje ekipe imaju po dva poraza, s tim da Mostarci imaju dvije utakmice manje od ostalih suparnika, a od nekih i tri.

Trener OKK Slobode Josip Pandža kaže da u Mejdani stiže aktuelni prvak BiH i da to samo po sebi dovoljno govori. Imaju "širok" roster, što im je nužno, jer igraju prvenstvo BiH i u ABA 2 ligu.

– Na našu nesreću, polako ulaze u formu, što upućuje na zaključak da u nedjelju neće biti nimalo lagano. Pobjedili su ekipu Splita na svom parketu, što dovoljno govori o njihovoj snazi, te sigurno sa dosta optimizma dolaze u Tuzlu – izjavio je Pandža.

Podsjetio je da jedan od najboljih igrača Zrinjskog, Marko Šutalo, na pojedinim utakmicama više vremena provodi na klupi, ali da to ne utiče u znatnijoj mjeri na konačan rezultat "plemića".

– Šutalo je prije tri – četiri godine bio standardni bh. reprezentativac, što je još jedan podatak koji govori kakva nam ekipa stiže u goste – podsjetio je trener OKK Slobode.

Naglasio je da je pauzu u prvenstvu ekipa iskoristila za konsolidaciju svojih redova. Odigrali su i kontrolnu utakmicu u Osijeku, te Pandža drži da je ostvaren veći nivo forme.

– Ko god dolazi u Mejdani, mi želimo pobjedu. Svjesni smo kvaliteta Zrinjskog, ali mi ćemo dati sve od sebe da u nedjelju ostvarimo novu pobjedu – zaključio je Pandža.

OKK Sloboda bi se pobjedom ponovo vratila na vodeću poziciju, s tim što treba reći da Široki ima utakmicu manje, a jedina je ekipa do sada s jednim porazom.

Utakmica OKK Sloboda – Zrinjski igra se večeras u velikoj dvorani Mejdani od 19 sati. (tl)

Date: 09-12-2018